

## Transkription von Urkunde QBD 1316a

Ort, Datierung: Quedlinburg, 1316-05-06

Signatur: Stadtarchiv Quedlinburg, Abt. III, 46

Inhalt: Graf Ulrich von Regenstein: Vergleich mit dem Rat der Stadt Quedlinburg

Wÿ Olrich von der ghenade godes Greue to Reghensteyn . vn(de) vnse Erven wy bekennen oppenbare vn(de) betvghen in dysseme . breve . Dat wy vns nach vnser herren vn(de) nach / vnser vrunde rade . myt ghvden wyllen . hebben vor lyket vn(de) vor sonet . myt deme Rade vn(de) myt den Bvrgheren vt der Alden stat to Quedelvnghheb(or)g . Alsus also hyr na ghescreven / ståt vmme allen werren vn(de) twydragt . de vnder vns was vn(de) vn(der) den bvrgheren to Quedelvnghheb(or)g . Dat wy scolē vn(de) wyllen se vor deghedyngghen . an allen yren noden vn(de) scolē / se nerghen hynderen an velde . noch dorpe . an watere noch an weyde . boven recht . Vn(de) wy vn(de) vnse voghede vn(de) vnse ghesynde . wy ne scolē se nycht an vorden an erme lyve vn(de) an erme / gvde weder kersten noch Jvden . vn(de) scolent halden also et von aldere stan heuet . Weyrte vns icht to den borgheren wy scolē se vor klagen vor deme Rade . oder vor deme rychte . / synt se schuldych se scolē sych myt vns vor lyken . nach ghe nade oder nach rechte . synt se vnschuldych so scole wy recht von en nemen . Weyrte och den vor benomeden borgheren icht / to vnseme synde de scole wy en weder to rechte setten . vn(de) wy be kennen des . vmme dat ghe Rychte vn(de) de vysscherige . twysschen d(er) alden stat vn(de) d(er) Nyen dat scal de alde stat / be halden . vn(de) de vt d(er) Nyen stat scolē ere wyden vn(de) ere hecge be halden also se nv stan . vn(de) de dämme scal men halden also se von aldere hebben ghewesen . vn(de) wy ne scolē / neynen nyen tollē maken noch neyne vnredelike pandinghe . vnse voghede noch vnse ghe synde scal nicht voderen vppe der Borghere ghvde . Twyschen d(er) alden stat vn(de) der Nyen . scal neyn / taverne wesen . Dat gresels hus heuet von aldere wesen . dat scal in deme westendorpe de neste taverne der stat syn . veret . Jenichman inde stat de vnse eyghen nicht en ys . des scole wy / staden myt ghvden wyllen hebbe wy auer denest vppe sime ghvde hat . dat scole wy behalden . vn(de) wat wy vnyllen hebben . de von des Marchgreven vogheden ghe komen ys vmme / yre ve . vn(de) vmme ere perde . vn(de) och vmme allen eren scaden . Dat scole wy vor deghedyngghen also verre also ere recht weret . Swat vor svmet ys an ghe richte vn(de) an vronen tynse / vn(de) an allen dingghen . dat ys myt vns vrvntlychen hyn ghe leghet . Wy ne scolē neyne nye Borg eder hus bvwen Quedelvnghheb(or)g vppe eyne myle na et en sy mit der Borgher willen / wy scolē dat dynch seluen sytten . vn(de) eyne ratman by vns . De Bvrghere scolē neyn nye lovede setten dat vns . schedelich sy to vnseme rechte . noch vnseme richtere . vn(de) / wy scolē de bvrghere laten by erme alden rechte . vn(de) se scolē vns laten by vnseme alden rechte . In eyne orkvnde desser deghedynghe de hyr vor be screven synt vn(de) eyner / sycherheyt aler dýnghe . vn(de) dat es neyn not mer ghe sche . hebbe wy greue Olrich von Reghensten . vn(de) vnse vrvnde de Edelen h(er)ren greve Otte von valkensteyn h(er) Gardyn / von hademersleue . Greue henrich von honsten de Eldere . greue Burchart von Mansvelt . greue Conrat von w(er)ny(n)gherode . greue Olrich to Reghensten de Jvngghere . hebbe wy alle vnse / ynghesyghele to desseme breue ghehenghet Tughe desser sone vn(de) deghedynghe . synt de edelen h(er)ren . greue Otte von valkensten . h(er) gardyn von hademersleue . De vor nomene riddere / h(er) albrecht von dem b(er)ghe . h(er) godel de voghet . vn(de) de achbaren knegte . Otte sconeals . henrich von atesleue . vn(de) ande(re) biderue lude . Desse Bref ys ghe gheven na godes bort / Dvsent Jar dre hvndert Jar . In deme sesteynden Jare Lateren daghe svnte Johannes ante portam latýnam

